

四庫全書

史部

欽定四庫全書

欽定續通志卷四百五十九

列傳

元十三

張晉亨

好古

王珍

楊格濟格

劉敏

王楫

王守道

高宣

焦德裕

石天麟

李邦瑞

楊貞

賈居貞

張晉亨字進卿冀州南宮人其兄同知安武軍節度使  
事顯以冀州數道之衆附嚴實于青崖後從實來歸進  
安武軍節度使西征戰沒歲戊寅穆呼哩承制署晉亨  
襲爵晉亨涉獵書史臨事周密實器之以女妻焉實遣  
子忠貞入質命晉亨與俱丁亥從國王博囉征益都以  
功遷恩州刺史兼行臺馬步軍都總領實征淮楚河南

晉亨畢從甲午命為東平路行軍千戶圍安慶攻定城  
略信陽拔六安大小數十戰策功居多實卒其子忠濟  
奏晉亨權知東平府事東平貢賦率倍他道迎送供億  
簿書獄訟日不暇給歷七年吏畏而民安之憲宗即位  
從忠濟入覲時包銀制行朝議戶賦銀六兩諸道長吏  
有輒請試行者晉亨面責之曰諸君職在親民民之利  
病且不知乎今天顏咫尺知而不言罪也承命而歸事  
不克濟罪當何如且五方土產各異隨其產為賦則民

便而易足必責輸銀雖破民之產有不能辦者大臣以聞明日召見如前言以對

按王五汝傳作王汝糾率諸路管民官總之闕下兩傳互

異

帝然之得減戶額三之一仍聽民輸他物定為制擢

恩州管民萬戶中統三年李璫叛晉亨從嚴忠範戰于遙牆滌勝之改本道鄂囉萬戶四年分將本道兵戍宿州首言汴是南北沃壤閒曠宜屯田以資軍食乃分兵列營以時種藝選千夫長督勸之期年皆獲其利至元八年改淄萊路總管兼軍事十一年詔伐宋晉亨在選

中聞命就道曰此報效之秋也分道由安慶渡江丞相  
巴延留之戍鎮江兼與民政戰焦山瓜洲皆有功十三  
年卒子好古

好古字信甫勇而有謀晉亨權知東平府事嚴忠濟承  
制以好古權其父軍戍宿州戊午奏真授行軍千戶攻  
樊城身中流矢戰不少卻略揚州循泰興海門而還擊  
邵伯埭拔之中統元年還宿州忠濟命兼恩州刺史未  
幾移戍蘄州宋人攻蘄好古率兵迎擊力戰死之弟好

義襲

按世祖紀至元元年以千戶張好古殺王事命其弟好義好禮並襲職是好古弟尚有好禮也傳失

載下江淮有功

王珍字國寶大名尚樂人金末盜起南樂人楊鐵槍聚衆保鄉里太祖攻破河朔鐵槍以兵應之行營帥安扎署珍軍前都彈壓鐵槍戰死蘇椿領其衆宋將彭義斌侵大名椿戰不利降之義斌遂據大名珍棄家走還軍中按扎嘉其誠待遇益厚從蘇勒呼擊走義斌蘇椿以大名降授大名路治中軍前行元帥府事俄以取寧海

昨城功復授統攝開曹滑濬等處行元帥府事兼大名  
路安撫使蘇椿復欲叛歸金珍覺之與元帥梁仲先發  
兵攻椿椿開南門遁授珍同知大名府事兼兵馬都元  
帥從拉卜台經略河南破金將武仙于鄭州復與金人  
戰于蕭縣斬其將國用安據徐邳珍從塔沁額蘇倫攻  
拔之授同簽大名行省事從伐宋破光州棗陽廬壽滁州  
宋城五河口珍帥死士二十人奪之宋人遁乘勝進師  
連破濠泗渦口歲庚子入見太宗授總帥本路軍馬管



民次官珍言于帝曰大名困于戰調貸借西域賈人銀及通糧五萬斛若復徵之民無生者矣詔官償所借銀復盡蠲其通賦朝議分蒙古漢軍戍河南以珍戍睢州修城隍明斥候宋兵不敢犯己酉進本路征行萬戶在鎮九年卒子文幹襲為行軍萬戶李璫叛從哈必赤討平之論功語以官賞文幹曰增秩則榮及一身賜金則恩逮麾下迺以白金二千兩器皿百事雜絲數百緡賞之文幹悉頒之軍中中統三年改同知大名路總管府



待為君計不如請降可以保富貴而免死亡進默然凡  
三往乃降辛卯大名守蘇椿叛討獲之滑濬等州聞風  
納款壬辰師次徐州阻河不得濟格濟格偵知有賊兵  
操舟楫伏草澤中率勁卒憑河擊之奪其舟衆遂得渡  
獲河南諸郡降人三萬餘戶進攻徐州金將國用安拒  
戰格濟格率百餘騎突入陣中截擊大敗之丁酉從額  
蘇倫攻歸德麾諸將縛草作筏渡壕抵城下梯城先登  
拔之由是進攻得五州十縣四堡二寨己亥宋兵至已

登城格濟格拒戰敗之率舟師追擊轉戰中流溺死子  
孝先僉江北淮東道肅政廉訪司事孝友鎮江路總管  
劉敏字有功宣德青魯人歲壬申太祖師次山西敏時  
年十二從父母避地德興禪房山兵至父母棄敏走大  
將憐而收養之一日帝宴諸將于行營敏隨入帝見其  
貌偉異之俾留宿衛習國語閱二歲能通諸部語帝嘉  
之賜名烏楚肯出入禁闥初為奉御帝征遼西及回回  
諸國敏皆從行尋授安撫使兼燕京路徵收稅課漕運

鹽場等事給西域工匠千餘戶及山東山西兵士立兩軍戍燕置二總管府以敏從子二人為之長命敏總其役奏李璆為參謀初耶律楚材總裁都邑契丹人居多其徒往往中夜挾弓矢掠民財官不能禁敏戮其渠魁令諸市又豪民冒籍良民為奴者衆敏悉歸之選民習星厯者為司天太史氏興學校進名士為之師太宗即位改造行宮幄殿及城和琳建萬安宮設宮闈司局立驛傳以便貢輸既成宴賜甚渥辛丑授行尚書省詔敏

所行有司不得預聞俄而伊囉幹齊自西域回奏與敏同治漢民帝允其請伊囉幹齊素剛尚氣恥不得自專俾其屬莽噶爾誣敏以流言敏出手詔示之乃已帝聞之罷伊囉幹齊令敏獨任復辟李臻為左右司郎中臻在幕府二十年多所參贊定宗即位詔敏同行省事憲宗立召赴行在所仍命與伊囉幹齊同政敏請以子世亨自代帝許之敏退居年豐世祖南征過年豐敏入見諭之曰我太祖勵精圖治見而知者惟卿耳汝春秋高

其景次以為後法未幾病卒于燕

王楫字巨川鳳翔號縣人弱冠入終南山讀書涉獵孫吳  
金泰和中詣闕上書給事縉山元帥府特賜進士出身  
授副統軍守涿鹿太祖將兵南下楫鏖戰三日兵敗見  
執將戮之神色不變太祖問曰汝曷敢抗我師對曰臣  
以布衣受恩誓捐軀報國今既償軍得死為幸帝義而  
釋之授都統令招集山西潰兵從大軍破紫荊關取涿  
易保州中山軍次雄州節度使孫吳堅守不下楫入城

喻以禍福吳遂以城降甲戌授宣撫使從僧格已圖太  
傅明安率兵南征下古北口攻薊雲順等州進圍中都  
乙亥中都降檄進言曰國家以仁義取天下不可失信  
于民宜禁俘掠以慰民望時城中絕粒人相食乃許軍  
士給糧入城轉糶故士得金帛而民獲粒食又議田野  
久荒而兵後無牛宜索軍回所驅牛十取其一以給農  
民從之復業者衆又招諭保定新城信安雄霸文安清  
滄諸城皆望風款附置行司于滄州鎮之河間清滄復



叛帝命檄討之復命駙馬巴圖分蒙古軍及紇漢軍三千屬檄遂復河間得軍民萬口巴圖惡其反覆欲盡誅之檄曰驅羣羊使東西者牧人也羊何知哉殲其渠魁足矣釋此輩遷之近縣强者使從軍弱者使為農此天所以畀我也何以殺為已圖曰汝能保此輩不復反耶曰可即移文保任之俱得全活帝命實里巴與皇太弟國王分撥諸侯王城邑諭實里巴曰漢人中若王宣撫者可任使之遂以前職兼判三司副使後又命省臣總括歸附工

匠之數將俾大臣分掌之帝曰舊人王宣撫可任是職  
遂命檇掌之時都城廟學毀于兵檇取舊樞密院地創  
立之春秋率諸生行釋菜禮仍取舊岐陽石鼓列廡下  
丙戌從征西夏及秦州夏人盡撤橋梁為備軍阻不得  
前檇夜督士卒運木石比曉橋成軍乃得進戊子奉監  
國公主命領省中都屬盜起信安結北山盜李宥轉掠  
近縣檇曰都城根本之地何可無備引水環城調度經  
費遣男守謙率軍討諸盜平之庚寅從征關中進克鳳

翔請于太宗曰此臣鄉邦也願入城訪求親族得數十口以歸癸巳奉命持國書使宋宋人甚禮重之遣使入貢檄前後凡五往以和議未決隱憂致疾卒宋人歸其柩于燕

王守道字仲履真定平山人金亡羣盜並起州縣吏多乘亂貪暴不法民往往殺令丞及屬吏宣撫司署守道為縣尉衆悅之因轉攝令改真定主簿史天倪為河北西路都元帥鎮真定既收大名澤潞懷孟城邑之未附者以為府經歷及金武仙降署為史天倪副帥

守道謂天倪曰是人位居公下意每不平安能鬱鬱于此宜先事為備天倪不以為然未幾果為所害及天澤為主帥攻仙復真定仙走保西山諸砦執守道家人以重幣誘之守道不顧日與史氏部曲昆弟徵發調度以復讐卒逐仙遁去後擢慶源軍節度使天澤為五路萬戶署守道行軍參謀兼檢察使中統三年天澤拜左丞相即授真定等路萬戶府參謀至元七年卒以子顯貴追封壽國公謚忠惠

高宣遼陽人太宗即位詔宣為元帥統兵從睿宗攻大  
名宣進曰今奉命出師伐罪弔民願勿嗜殺以稱上意  
睿宗下令軍中如宣言及城破兵不血刃民心悅服壬  
辰從破金兵三峯山降宣者三千餘戶籍以獻立打捕  
鷹坊都總管府統之以宣為都總管仍令世其職卒追  
封營國公謚簡僖子天錫事世祖潛邸為筆且齊入宿  
衛中統二年授以其父官四年改燕京諸路鄂囉總管  
遷按察副使語丞相博囉左丞相張文謙曰農桑者衣食

之本不務本則民衣食不足教化不可興古之王政莫先于此願留意焉丞相以聞帝悅命立司農司以天錫為中都山北道巡行勸農使尋遷司農少卿又遷戶部侍郎進兵部尚書卒追封營國公謚莊懿子諒終兵部尚書諒子塔斯布哈成宗命世其祖父官以居喪辭大德元年授奉議大夫章佩監丞歷官至大司農英宗居

東宮塔斯布哈集前代嘉言善行名曰承華事略

按裕宗及

王惲傳承華事略二十篇乃裕宗在東宮時王惲之所進者也本傳云塔斯布哈進之英宗豈微其意而行之

者歟

并畫幽風圖以進帝覽之獎諭曰汝能輔太子以正朕甚嘉之命置于東宮俾太子時時觀看延祐六年改集禧院使退居于家卒

焦德裕字寬父雄州人父用仕金為千戶守雄州北門太祖兵至州人開南門降用猶力戰遂生獲之帝以其忠壯釋不殺復舊官徇地山東未嘗妄殺一人以德裕貴追封恒山郡公謚正毅德裕通左氏春秋少拳勇善射從其舅解昌軍中金將武仙殺史天倪既敗走其黨

趙貴王顯齊福等保仙故壘數侵掠太行太宗擇廷臣  
有才辯者往招之楊惟中以德裕薦遂使真定降齊福  
擒趙貴王顯亡走德裕追射殺之中統四年為閭蓬等  
處都元帥府參議宋夏貴圖宣撫使張庭瑞于虎嘯山  
竇薪土塞水源人無從得飲帥府檄德裕援之夜薄貴  
營令卒各持三炬貴驚走追及鵝谿馘千人至元十一  
年從丞相已顏南征授僉行中書省事遂從下安慶至  
鎮江焦山時主僧誘居民叛丞相阿珠既誅其魁欲盡



阮其徒德裕諫止之命德裕先入城撫定宋平賜予有加平章阿哈瑪特譖已弑殺丁家洲降卒奏以德裕為中書參政欲假一言證成之德裕辭不拜十四年改淮東宣慰使淮西賊保司空山檄淮東四郡守為應元帥特爾格邏得其檄即械郡守四人使承反狀德裕言四人者皆新降將天子既寵綏之有地有民盈所望矣安有他覲寧知非反間耶盡復其官拜福建行省參知政事二十五年卒追封恒國公謚忠肅子簡餘姚州知州

潔信州治中

石天麟字天瑞順州人年十四入見太宗留宿衛帝命  
中書令耶律楚材薦正庶務選賢能為參佐天麟在選  
賜名蒙古台宗王征西域以天麟為斷事官憲宗六年  
遣使海都拘留久之既而邊將劫皇子北安王以往寓  
天麟所天麟與其用事臣相親狎因語以宗親恩義及  
臣子逆順禍福之理海都聞之悔悟遣天麟與北安王  
同歸天麟被拘留二十八年始得還世祖大悅賞賚甚

厚拜中書左丞兼斷事官辭曰臣奉使無狀陛下幸赦  
弗誅何可復叨榮寵貽廟堂羞不敢奉詔帝嘉其誠褒  
慰良久從之有譖丞相安圖嘗受海都官爵者帝怒天  
麟奏曰海都實宗親偶有違言非仇敵比安圖不拒絕  
之所以釋其疑心導其臣順也帝怒乃解天麟年七十  
餘帝以所御金龍頭杖賜之曰卿年老出入宮掖杖此  
可也時權臣用事凶焰薰炙人莫敢言天麟獨斥其姦  
無所忌成宗即位加司徒武宗即位進平章政事至大

二年卒追封冀國公謚忠宣子珪南臺御史中丞

李邦瑞字昌國京兆臨潼人幼嗜學讀書通大義嘗被掠逃至太原為金將小史從守閭漫山寨穆呼哩攻下諸城堡金將走邦瑞率衆來歸守臣惜其材具鞍馬遣至行在所中書以間歲庚寅受旨使宋至寶應不得入未幾命復往諭行省李全護送宋仍拒之又使道出蘄黃宋遣賤者來迎邦瑞怒叱出之宋改命行人乃議如約而還太宗慰勞賜旃裘車騎邦瑞因奏干戈之際宗

族離散乞歸尋訪許甲午從諸王庫春經略河南凡所  
歷河北陝西州郡四十餘城繪圖以進授宣差軍儲使  
尋卒

楊真字煥然乾州奉天人年十一母歿哀毀如成人金  
未舉進士不中作萬年策指陳時病未及上而歸教授

鄉里

按元一統志載真隱居鄠縣講  
道授徒學者稱爲紫陽先生

歲癸巳金元帥崔

立以汴京降真微服北渡冠氏帥趙壽之延致之待以  
師禮東平嚴實聞真名數問其行藏真終不一詣戊戌

太宗詔宣德稅課使劉用之試諸道進士真試東平兩  
中賦論第一從監試官北上謁中書耶律楚材奏授河  
南路徵收課稅所長官兼庶訪使將行言于楚材曰僕  
以書生理財賦已非所長況河南兵荒之後遺民無幾  
烹鮮之喻正在今日急而擾之糜爛必矣願假以歲月  
使得撫摩瘡痍以為朝廷愛養基本萬一之助楚材甚  
善之真既至約束簡易按行境內親問監務月課幾何  
難易若何有以增額言者真責之曰剝下欺上汝欲我

為之耶即減元額四之一公私便之在官十年乃請老  
于燕之行臺以疾卒謚文憲真不治生產家無十金之  
業而喜周人之急雖力不贍猶勉強為之人有片善則  
委曲稱獎唯恐其名不聞或小過失必盡言勸止不計  
其怨怒也所著有還山集六十卷大興近鑑三卷正統  
書六十卷行于世

賈居貞字仲明真定獲鹿人

按金史賈守謙官尚書右丞次子順卿居貞順卿子

也見姚燧所撰神道碑

甫弱為行臺從事有餽黃金五十兩者居

貞卻之世祖在潛邸知其賢召用之俾監築上都城中  
統元年授中書左右司郎中從帝北征每陳說資治通  
鑑一日帝問郎俸幾何居貞以數對帝謂其太薄敕增  
之居貞辭曰品秩宜然不可以臣而紊制劉秉忠奏居  
貞為參知政事又辭曰他日必有由郎官援例求執政  
者將何以處之不拜至元五年改給事中纂修國史十  
一年丞相巴延伐宋居貞以宣撫使議行省事既渡江  
下鄂漢巴延以大軍東下留左丞阿爾哈雅與居貞分



省鎮之居貞曰江陵要地宋制閩重兵所屯聞諸將不睦遷徙之民盈城復皆疾疫芻薪乏闕杜門不敢樵採不乘隙先取迨春水漲上流為彼所乘則鄂危矣驛聞十二年命阿爾哈雅領兵取江陵居貞以僉行省事留鄂于是發倉廩賑流亡免括商稅并湖蕲禁一方安之婁安邦以信陽來歸遣入覲裨將陳思聰屠其家居貞以計召至數思聰罪而誅之宋幼主既降其相陳宜中等挾二王逃閩廣民爭應之蕪州寇起司空山屬縣民

傅高亦起兵應居貞移檄諭以禍福其下往往涣散歷以官軍遂削平之高變姓名逃逸獲而戮之十四年除湖北宣慰使明年遷江西行省參知政事時逮捕民間受宋二王文帖者甚急坐繫巨室三百餘居貞至悉出之投其帖于水火士卒有挾兵入民家者皆痛繩以法南安李梓發作亂居貞慮將帥出兵擾民率千人親往營于城北遣人諭之賊衆聞居貞至皆散匿不復為用梓發閉妻子一室自焚死比還不戮一人十七年朝廷

再征日本造戰艦于江南居貞將入朝奏罷其事未行  
以疾卒追封定國公子鈞字元播由權茶提舉拜監察  
御史累官參知政事為政持大體不子子鈞名譽皇慶  
元年從幸上都遇疾卒于家

欽定續通志卷四百五十九

欽定四庫全書

欽定續通志卷四百六十

列傳

元十四

洪福源

俊奇萬

居祥

鄭鼎

制宜

李進

舒穆魯安扎

洪福源其先中國人唐遣才子八人往教高麗洪其一也子孫世貴于三韓名所居曰唐城父大宣以都領鎮

麟州福源為神騎都領因家焉歲丙子金源契丹

高麗傳作

契丹人金山元帥祿格等

九萬餘衆竄入高麗奪江東城據之太祖

命哈齊濟扎拉將兵追討大宣迎降與哈齊濟等共擊之降其元帥趙忠壬午遣扎古雅等覲納款虛實遇害辛卯太宗命扎塔薩喇達討之福源率先附之民攻未附州縣進至王京高麗王暉遣其弟懷安公佺請降遂置王京及州縣達嚕噶齊七十二人以鎮之師還高麗復叛殺所置官驅國人入據江華島福源招集北界

四十餘城遺民以待太宗復遣薩喇達將兵來討中流矢卒其副將特爾格引兵還唯福源留屯癸巳高麗悉衆來攻西京屠其民劫大宣以東福源遂以所招集北界之民處于遼陽瀋陽之間帝嘉其忠授管領歸附高麗軍民長官仍令招討本國未附人民乙未帝命唐古巴圖爾與福源進討攻拔龍崗咸從二縣鳳海洞三州山城及慈州又拔金山歸信昌朔州乙巳定宗命阿木哈將兵與福源共拔威州平鹵城癸丑憲宗命從諸王

伊勒呼攻禾山東州春州三角山揚根天龍等城拔之

甲寅與扎拉台合兵攻光州安城忠州玄鳳珍原甲向

玉果等城又拔之

按憲宗五年乙卯紀云是歲改命扎拉岱與洪福源同征高麗後此又連

二歲攻拔其光州安城中州玄鳳珍戊午高麗族子王

原甲向玉果等城與本傳紀年互異

縛入質陰欲併統本國歸順人民謖福源于帝遂見殺

後贈瀋陽侯謚忠憲子俊奇君祥

俊奇小字茶丘幼從軍以驍勇受知世祖嘗以小字呼

之中統二年茶丘雪父冤世祖聞之命襲父職管領歸

附高麗軍民總管至元六年高麗權臣林衍叛詔從國  
王特訥克討平之遷江華島所有臣民歸王京復命茶  
丘率兵往鳳州等處立屯田總管府八年林衍餘黨裴  
仲孫等立高麗王禎親屬承化侯為王引三別抄軍據  
玆島以叛茶丘偕經畧使實都進兵破其軍殺承化侯  
其黨金通精率餘衆走耽羅茶丘得通精之姪金永等  
七人俾招之通精不從留金永餘盡殺之十年詔茶丘  
與實都率兵渡海擊破耽羅獲通精殺之高麗平十一



年授東征右副都元帥與都元帥呼敦

經世大典及日本傳俱作實都

等領舟師二萬渡海征日本拔對馬一岐宜靈等島

日按

本傳云時官軍不整又矢盡唯掠四境而歸與本傳異

十七年進征東行省右丞

十八年與實都將舟師四萬由高麗金州合浦以進再

征日本風壞舟而還二十四年納顏叛車駕親征命率

高麗女真漢軍扈從猝遇納顏騎兵萬餘時茶丘兵不

滿三千衆有懼色茶丘夜令軍中多裂裳帛為旗幟斷

馬尾為旄掩映林木張設疑兵納顏大驚以為官兵大

至遂降凱還授遼陽行省右丞二十七年以疾辭叛王  
哈坦等竄入高麗侵撓其國西京距遼陽二千里皆騷  
動中書省特起茶丘鎮遼左帝二十八年卒子萬

君祥小字雙叔

巴延傳  
作雙壽

年十四隨兄茶丘見世祖于上

京帝悅令選師儒誨之至元三年籍高麗民三百人為  
兵令君祥統之從巴顏等軍築萬壽山復從開通州運  
河帝嘗閱江南海東輿地圖欲召知者詢其險易巴延  
以君祥應奏對詳明帝悅謂巴延曰是兒遠大器也六

年林衍叛從特訥克征之十年從元帥布爾罕襲淮東  
之陽湖十一年巴延代宋命右衛指揮使圖捫岱率輕  
銳攻淮安以牽制之君祥以蒙古漢軍都鎮撫從行巴  
延既渡江圖捫岱還軍蕭縣時君祥奉使巴延軍中宋  
黃州制置使陳奕降其子巖知漣水軍巴延遣三十騎  
往招之因令君祥入奏帝曰卿可急還陳知府降即偕  
來也及與俱入朝宴勞甚厚從元帥博羅罕攻清河拔  
之巴延師次鎮江

按巴延傳云軍至崇德宜中使郭統洪模持書來見本傳作師次鎮江互

異諜報有宋洪都統者為都督府將巴延謂君祥曰汝  
同姓可往招致也洪都統欣然來見君祥厚遇之師次  
臨平洪都統來報曰宋丞相陳宜中殿帥張世傑皆已  
逃去惟三宮未行宜早定計以活生民巴延令君祥偕  
洪都統護宋三宮北還宋平累遷同僉樞密院事二十  
四年納顏叛君祥從世祖親征每駐蹕君祥輒以兵車外  
環為營衛布置嚴密帝嘉之凱還類次車駕起居為東  
征錄二十八年加集賢大學士仍同僉樞密院事議者

欲自東南海口辛橋開河合灤河運糧至上都奉旨與  
中書右丞阿里相其利害還極言不便罷之成宗即位  
詔裁減久任官知樞密院安巴等奏君祥在樞密十六  
年最為久者帝曰君祥始終一心可勿遷也大德三年  
奉使江浙間問民疾苦使還居昌平皇華山絕口不  
論時事者五年九年擢司農俄拜中書右丞  
俱作大德七年改遼陽行省右丞武宗即位進平章政事卒子  
邁同知開元總管府事

按成宗紀  
宰相年表

萬小字重喜至元十八年襲為高麗軍民總管二十四  
年納顏叛率兵至薩里圖嚕之地同都萬戶實喇特穆  
爾與納顏將黃海戰大敗之又從世祖與塔布台戰敗  
之奉旨留蒙古女真漢軍鎮哈喇河復從御史大夫伊  
蘇特穆爾至扎穆爾圖與金嘉努戰敗之追至納古爾  
江遂平金嘉努塔布台等師還哈坦巴喇噶齊再叛重  
喜從諸王阿雅噶齊平章達春

按達春傳作達  
東道宣慰使

都萬戶

實喇特穆爾征之次瑪古布拉克時諸王托歡四千餘

人與其黨戰稍却重喜率騎兵援之大破其衆從諸王  
與叛王兵戰于烏珠站又戰于黑龍江塔瑪噶處皆敗  
之二十五年從伊蘓特穆爾出師至果勒河與哈坦多  
羅千戰獲功又從征茂巴爾與輝圖多羅千戰克之二  
十八年從平章色徹肯至高麗青州與哈坦戰屢敗之  
累功授遼陽行省右丞至大二年謫漳州行至杭遇赦  
明年卒

鄭鼎澤州陽城人幼孤能自立既長勇力過人善騎射

初為澤潞遼沁千戶歲甲午從塔海幹布征蜀攻二里散關屢立戰功還屯秦中宋將余侍郎燒絕棧道以兵圍興元鼎率衆修復之破宋兵解興元之圍庚戌從憲宗征大理國自六盤山經臨洮下西蕃諸城抵雪山山徑盤屈舍騎徒步嘗背負憲宗以行敵據扼險要鼎奮身力戰敵敗北至金沙河波濤洶湧帝臨水旁危石立馬觀之鼎諫曰此非聖躬所宜親扶下馬帝嘉之俄圍大理晝夜急攻城陷禽其主大理平師還命鼎居後道



經吐蕃全軍而歸辛亥入朝帝問以時務鼎數對詳明  
賜名伊克巴圖己未從世祖南伐攻大勝關破之繼破  
臺山寨乘勝獨進前陷泥淖遇伏兵突出葭葦間鼎奮  
擊連殺三人餘衆遁去帝駐蹕江潁鼎首奪南岸衆軍  
畢渡進圍鄂州別攻興國軍遇宋兵五千力戰破之擒  
其將桑太尉斬之中統元年以功遷平陽太原兩路萬  
戶阿勒達爾琿塔噶之亂鼎率本道兵分討之二年統  
征西等軍戍雁門關隘至元三年遷平陽路總管是歲

大旱鼎下車而雨平陽地狹人衆常乏食鼎乃導汾水  
溉民田千頃餘開潞河鵬黃嶺道以來上黨之粟修學  
校勵風俗建橫澗故橋以便行旅民德之七年改僉書  
西蜀行省事將兵巡東川過嘉定遇蜀兵與戰江中擒  
其將李越悉獲戰船十四年授湖北道宣慰使鎮鄂州  
蘄黃二州叛鼎將兵討之戰于樊口舟覆溺死贈中書  
右丞謚忠毅後追封潞國公謚忠肅子制宜

制宜小字納懷性聰敏莊重有器局通習國語至元十

四年襲太原平陽萬戶仍戍鄂州攝府事十九年朝廷將征日本造樓船何家洲洲地狹衆欲徙旁居民制宜不從改授寬地居民德之有盜伏近郊晨暮剽劫流言將入城俄有數男子自城外至顧盼異常制宜命吏縛入獄問之無驗行省將釋之不從明日再出城東遇一人乘白馬貌服殊異制宜叱下訊之乃與前數男子同為盜者遂正其罪一郡帖然二十四年扈駕東征納顏請赴敵自效從命伊嚕勒諾延別為一軍以戰功授樞

密院判官二十八年遷湖廣行省參知政事陞辭帝曰  
汝父死王事賞未汝及近者約蘇穆爾伏誅已籍沒其  
財產人畜汝可擇其佳者取之制宜對曰彼以賊敗臣  
復取之寧無汚乎帝賢其有守三十年除湖廣行樞密  
副使湖南地濶遠羣寇依險出沒昭賀二州及廬陵境  
民常被害制宜率偏師徇二州道經廬陵永新獲首賊  
及其黨皆殺之茶鄉譚計龍者聚惡少年匿兵器為姦  
既捕獲其家納賂以緩獄事制宜悉以勞軍斬計龍于

市自是湖以南無復盜賊元貞元年有制行樞密院添置副使一員與制宜連署制宜以員非常設先任者當罷入朝授大都留守領少府監兼武衛親軍都指揮使大德十年卒追封澤國公謚忠宣

李進保定曲陽人幼隸軍籍初從萬戶張柔屯杞之三义口築堡于龍岡會淮水汎漲宋舟師猝至進率兵十五人載一舟轉鬪十餘里奪一巨艦以功授百戶戊午憲宗西征時丞相史天澤經畧河南選諸道兵之驍勇

者從命進為總把由陳倉入興元度米倉關其地荒塞  
不通進伐木開道七百餘里至定遠七星關其關上下  
皆築柵堡宋以五百人守之巴渠江水環堡東沅天澤  
命進往關下說降之不從進潛視間道歸白天澤曰彼  
可取也夜二鼓進率勇士七十人掩其不備攻之脫門  
樞而入者二十人守門者覺拔刀拒之進被傷懸門俄  
閉諸軍不得入進與二十人力戰殺傷三十人兵走上  
堡進乃毀懸門納諸軍宋兵不能敵俱散走遂得其堡

守之關路始通諸軍盡度己未天澤兵至行在所圍合  
州釣魚山寨宋由嘉陵江以舟師來援泊黑石峽東北  
軍船泊峽西帝立馬東山擁兵二萬夾江而陣天澤下  
令于衆曰聽吾鼓視吾旗毋少怠也頃之間鼓聲視其  
旗東指諸軍遂鼓譟而入宋前鋒潰戰艦繼亂順流縱  
擊死者不可勝計帝顧謂諸將曰白旗下服紅半臂突  
而前者誰也天澤以進對賞錦衣名馬又戰浮圖關前  
後凡五戰皆以功受上賞至元十二年從畧地湖北湖

南宋平以兵馬使分兵屯鄂州十九年移屯西域巴實  
伯里二十三年海都及都勒斡等叛領軍至洪水山進  
與力戰衆寡不敵軍潰被擒從至吹巴勒遁還二十六  
年授左翼屯田萬戶元貞元年卒子雲襲授武德將軍  
左翼屯田萬戶

舒穆魯安扎契丹人世居太原父大嘉努率漢軍五百  
人歸太祖歲戊午安扎代領其軍從都元帥耨埒攻成  
都時宋兵聚于靈泉安扎以所部兵與戰大敗之殺其



將韓都統又從都元帥阿敦攻瀘州以戰艦七十行至馬湖江宋軍先以五百艘控扼江渡安扎擊敗之時宋兵于沿江撤橋據守安扎相地形造浮橋師至無留行宋欲挽其役兵出輒敗自馬湖以達合江涪江清江凡立浮橋二十餘所論功居最己未宋以巨艦載甲士數萬屯清河浮橋相距七十日水暴漲橋壞西岸軍多漂溺安扎軍東岸急撤浮橋聚舟岸下士卒得不死又援出別部軍五百餘人憲宗遣使慰諭賞賜甚厚叙州守

將橫截江津軍不得渡安扎聚軍中牛皮作渾脫及皮  
船乘之與戰破宋軍奪其渡口作浮橋以濟師中統三  
年授河中府船橋水手軍總管至元六年行省伊蘇岱  
爾領兵趨瀘州遣安扎運器械糧食由水道進宋兵復  
扼馬湖江安扎擊敗之生獲四十人奪其船五艘復以  
水軍一千運糧於眉簡二州軍中賴之九年從征建都  
蠻歲餘不下安扎先登其城力戰遂降之軍還道病卒  
子布拉代領其軍從攻嘉定以巨艦七十艘據其上流

于府江紅岸灘造浮橋以渡十二年嘉定降宋將鮮于都統率衆遁布拉追至大佛灘盡斃之行院汪良臣

原文

作汪特格按特格汪德臣賜名也德臣卒于憲宗已未年本傳事跡與汪良臣傳相符今據改正

攻取

紫雲瀘叙等城布拉功最多及諸軍圍重慶布拉先以戰艦三百艘絕其走路十三年領隨翼軍五百人會招討伊勒哈藍柵于白水江岸以為備布拉乘夜襲宋軍直抵重慶城下攻千斯門宋軍驚潰涪州守將率舟師來援布拉擊敗之從攻瀘州勒所步兵攻神臂門蟻附

以登明日復戰破之十五年復攻重慶太平門布拉先  
登宋都統趙安以城降總管黃亮乘舟遁布拉追擒之  
十六年命襲父職為船橋軍馬總管十八年大小盤諸  
峒蠻叛命諸翼蒙古漢軍戍施州既而蠻酋悉平遂以  
為保寧等處萬戶

欽定續通志卷四百六十

欽定四庫全書

欽定續通志卷四百六十一

列傳

元十五

董文炳

士選

張弘範

弘畧

董文炳字彥明俊之長子也幼警敏善記誦歲乙未以父任為橐城令同列皆父時人輕文炳年少吏亦不之憚文炳明於聽斷未幾同列束手下之縣貧重以旱蝗

而徵歛日暴文炳出私穀數千石與縣縣得以寬民前  
令因軍興乏用稱貸於人以民蠶麥償之文炳曰民困  
矣乃以田廬計直與貸家朝廷初料民令敢隱實者誅  
籍其家文炳使民聚口而居少為戶數衆以為不可文  
炳曰為民獲罪吾所甘心由是賦歛得大減旁縣民有  
訟不得直者皆詣文炳求決時府索無厭文炳抑不予  
府欲中害之即棄官去癸丑世祖征南詔文炳率四十  
六騎往人馬道死殆盡至吐番止兩人能從乏食日行

不能二三十里然志益厲期必至軍會使者遇之還言其狀世祖命其弟文忠解尚殿五馬載糗糧迎文炳既至世祖壯其忠由是日親貴用事己未從伐宋至淮西臺山寨命文炳往取之文炳馳至寨下諭以禍福守者懼遂降師次陽羅堡宋兵築堡於岸陳船江中軍容甚盛文炳請於世祖曰長江天險宋所恃以為國不奪其氣不可即與敢死士數百當其前率弟文用文忠載勝幢鼓櫂疾趨鋒既交文炳麾衆趨岸搏之宋師大敗世



祖方駐香爐峯聞戰勝扶鞍起立豎鞭仰指曰天也且命他師毋解甲明日將圍城旣渡江會憲宗崩班師中統元年命文炳宣慰燕南諸道還奏曰人久弛縱一旦遽束以法不可宜赦天下與之更始世祖從之反側者遂安二年擢山東東路宣撫使遙授侍衛親軍都指揮使三年李璫反會諸軍圍之文炳抵城下呼璫將田都帥降衆遂亂璫兵有沂漣

原傳作沂漣誤今依續通鑑改正

兩軍二萬

餘人皆善戰主將怒其與賊配諸軍使陰殺之文炳當

殺二千人言於主將曰彼為瓊所脅耳殺降恐非聖天子之意主將從之瓊伏誅山東猶未靖乃以文炳為經畧使率親軍以行出金銀符五十有功者聽與之文炳至益都留兵於外從數騎入居府不設警衛召瓊故將吏立庭下諭之所部大悅山東以安至元三年授鄧州光化行軍萬戶河南等路統軍副使造戰艦五百艘習水戰預謀取宋方畧帝嘗召文炳密謀欲大發河北民丁文炳曰河南密邇宋境人習江淮地利宜使河北耕

以供軍河南戰以關地俟宋平則河北長隸兵籍河南  
削籍為民如是為便又請頒將校俸錢帝皆從之七年  
改山東路統軍副使治沂州沂與宋接境鎮兵仰內郡  
餉運有詔和糴本部文炳命收州縣所移文衆諫以違  
詔文炳曰但止之乃遣使入奏畧曰敵人接壤知吾虛  
實一不可違民供頓甚勞二不可困吾民以懼來者三  
不可帝大悟罷之九年遷樞密院判官行院事於淮西  
築正陽兩城夾淮相望以綴襄陽及擣宋腹心十年拜

參知政事夏會霖雨水漲宋淮西制置使夏貴帥舟師十萬  
來攻文炳登城禦之一夕貴去復來飛矢貫文炳左臂  
著脇文炳拔矢引弓發四十餘矢遂悶絕幾殆明日水  
入外郭文炳麾士卒卻避貴乘之壓軍而陳文炳病創甚  
子士選請代戰文炳壯而遣之復自起束創手劍督戰  
士選以戈擊貴將獲之以獻貴遂去不敢復來十一年  
會已延於安慶安慶守將范文虎以城降文炳請前行  
已延許之宋都督賈似道棄師走次當塗文炳復言於

巴延曰采石當江之南和州對峙不取必有後顧遂進  
攻之降知州事王喜時揚州真州堅守不下常州蘇州  
既降復叛張世傑等陳大艦萬艘碇焦山下文炳身犯  
之載士選別船從子士表請從許之文炳乘輪船建大  
將旗鼓士選士表船翼之大呼突陳諸將繼進飛矢蔽  
日戰酣短兵相接宋兵亦殊死戰橫屍委仗江水為之  
不流自寅至午宋師大敗世傑走文炳追及於夾灘世  
傑收潰卒復戰又破之遂東入於海宋力自此遂窮諸

軍復分三道而進文炳居左由江並海趨臨安江陰軍  
貪判李世脩以城來附所過民不知兵凡獲生口悉縱  
遣之張瑄有衆數千負海為橫文炳命士選往降之得  
海船五百十三年師次鹽官招之不下將佐請屠之文  
炳遣人入城諭意縣降遂會已延於臨安城北張世傑  
欲以其主逃之海文炳繞出城南戍浙江亭世傑計不  
行乃竊宋主弟吉王昱廣王昺南走宋主遂降已延命  
文炳入城罷宋官府散諸軍封庫藏收禮樂器及諸圖

籍文炳取宋主諸璽符上於巴延巴延以宋主入覲有  
詔留事一委文炳時翰林學士李槃奉詔招宋士至臨  
安文炳謂之曰國可滅史不可沒宋十六主有天下三  
百餘年其太史所記具在史館宜悉收以脩典禮乃得  
宋史及諸注記歸之國史院宋宗室福王與芮赴京師  
徧以重寶致諸貴人文炳獨卻不受及官錄與芮家具  
籍受寶者惟文炳無名巴延入朝奏曰臣等奉天威平  
宋宋既已平懷徠安集之功董文炳居多帝曰文炳忠

勤朕所素知乃拜中書左丞時張世傑奉吉王昴走台州閩中亦為宋守敕文炳進兵所過禁士馬無踐田麥於是南人感之不忍以兵相向次台州世傑遁盡縱諸將所俘州民得免者數萬口由温州逾嶺而南閩人扶老來迎漳泉建寧邵武諸郡皆送款來附十四年帝在上都遣北邊有警將親征急召文炳文炳至自臨安入見請事北邊帝曰朕召卿意不在是豎子盜兵朕自撫定山以南國之根本也盡以託卿卒有不虞便宜處置



以聞中書省樞密院事無大小咨卿而行文炳避謝不許因奏曰臣在臨安時阿勒巴奉詔檢括宋諸藏貨寶追索沒匿人寔苦之宋人未洽吾德遽苦之以財恐非懷安之道即詔罷之還大都更日至中書樞密不署中書案平章政事阿哈瑪特方恃寵用事生殺任情惟畏文炳嘗執筆請曰相公官為左丞當署省案請至再終不肯或問故文炳曰主上所付託者在根本之重非文移之細且吾少徇則濟姦不徇則致讒讒行則身危深

失付託本意吾是以預其大政而畧其細務也十五年  
有疾奏請解機務召赴上都命僉書樞密院事未幾卒  
按元明善董氏家傳云文炳死後十餘年奸臣僧格敗  
事帝召文炳子士選入曰汝父忠勤不欺成吾大事汝  
不必遠學學汝父足矣又曰曹彬不殺降一事較之汝  
父未足為多本傳及士選傳俱不載附識於此焉耳  
贈平章政事謚忠獻子士元士選士元見忠義傳

士選字舜卿文炳次子也幼從文炳居兵間文炳總師  
與宋兵戰焦山士選戰甚力大敗之追至海而還及降  
張瑄等奏功為管軍總管宋平詔置侍衛親軍諸衛以

士選為前衛指揮使未幾以職讓其弟士秀帝命士秀將前衛而以士選同僉行院事於湖廣宗王納顏叛帝親征召士選至行在所與李庭同禦之飛矢及乘輿士選等出步卒橫擊之敗其衆帝稱善尋遷中書左丞鎮浙西聽辟舉僚屬至部察病民事悉以帝意除之有聚斂臣為奸利事發得罪且死詐言所遣舶商海外未至請留以待之士選曰海商至則捕錄之不繫斯人之存亡也遂竟其罪成宗即位拜江西行省左丞贛州盜劉六

十僞立名號

按經世大典云劉六  
十名季自號劉王

聚衆萬餘朝廷遣兵

討之主將觀望退縮守吏又因以擾民賊勢益盛士選  
請往率掾史二人至贛境捕官吏害民者治之進至興國縣去  
賊巢不百里命將校分兵守地察激亂之人悉寘於法復  
誅姦民之為囊橐者於是民爭出自効不數日遂擒賊魁  
散餘衆歸農軍中獲賊所為文書旁近郡縣富人姓名  
具在悉焚之民心益安遣使上于朝中書問其使曰董  
公上功簿邪使者曰某且行左丞授之言曰朝廷若以軍

功為問但言鎮撫無狀得免罪幸甚何功之可言因出  
其書但請黜賊吏數人不言破賊事廷議歎其不伐拜  
江南行御史臺中丞俄拜御史中丞時丞相諤勒哲用  
劉深言出師征八百媳婦國遠冒煙瘴及至士卒死者  
十已七八驅民轉餉谿谷間民死者亦數十萬中外騷  
然而諤勒哲說帝江南之地盡世祖所取陛下不興此  
役則無功可見於後世帝入其言用兵意甚堅無敢諫  
者士選獨言今劉深出師以有用之民而取無用之地

就令當取亦必遣使諭之諭之不從然後聚糧選兵視時而動豈得輕用一人言致百萬生靈於死地帝色變曰事已成卿勿復言士選曰以言受罪臣職所當他日以不言罪臣臣死何益帝麾之出未數月帝聞師敗績慨然曰董士選之言驗矣吾愧之始為罷兵誅劉深等久之遷汴梁行省平章政事又遷陝西士選平生以忠義自許號廉介自門生部曲無敢通饋獻者尤敬禮賢士在江西以屬掾元明善為賓友既又得吳澄而師之延

虞汲於家塾教其子及遷南行臺又招汲子集與范梈等數人皆以文學顯子守忠雲南行省參知政事守慤侍正府判官守思知威州

張弘範字仲疇易州定興人柔第九子也年二十時兄

順天路總管弘畧

按虞集廟堂碑云順天者故保州以柔故升府後改今名曰保定

上

計壽陽行都留弘範攝府事吏民服其明決蒙古軍所過肆暴弘範杖遣之入其境無敢犯者中統三年授行軍總管從親王討李璫於濟南柔戒之曰汝圍城勿避

險地汝無怠心兵必致死主者慮其險苟有來犯必赴  
救可因以立功弘範營城西瓊出軍突諸將營獨不向  
弘範弘範曰瓊必以奇兵來襲遂築長壘內伏甲而外  
為壕開東門以待之夜令浚壕益深廣瓊不知也明日  
果擁飛橋來攻未及岸軍陷壕中得跨壕而上者突入壘  
門遇伏皆死至元元年授順天路管民總管俄移守大  
名歲大水漂沒廬舍租稅無從出弘範輒免之朝廷罪  
其專擅弘範奏曰今歲水潦不收倘必責民輸倉庫雖



實而民死亡殆盡明年租將安出曷若活其民使不致逃亡則歲有恒收矣帝嘉其知體勿問六年括諸道兵圍宋襄陽授益都淄萊等路行軍萬戶成鹿門堡以斷宋餉道且絕郢救兵弘範建言曰國家規取襄陽為淹久計者所以重人命而欲其自斃也然其境南接江陵歸峽商販行旅絡繹不絕寧有自斃之時乎若城萬山以斷其西柵灌子灘以絕其東則庶幾速斃之道也帥府奏用其言移弘範兵戍萬山既城與將士較射出東門宋

師奄至衆欲退弘範曰吾與諸君在此何事敵至將不戰乎即擐甲上馬遣偏將李庭當其前親率二百騎為長陣令曰聞吾鼓則進宋軍步騎相間突陣弘範軍不動再進再卻弘範曰彼氣衰矣鼓之前後奮擊宋師奔潰九年攻樊城流矢中其肘裏瘡見主帥曰裏樊相為脣齒故不可下若截江道斷其援兵水陸夾攻樊必破矣樊破則襄陽無所恃從之明日出銳卒先登拔之十一年丞相已延伐宋弘範率左部軍循漢江東畧郢西南

取武磯堡渡江宋相賈似道督兵阻蕪湖殿帥孫虎臣據  
丁家洲弘範轉戰而前諸軍繼之宋師潰長驅至建康  
按蘇天爵名臣事畧云巴延至建康大會諸將出庫金  
行賞弘範後至巴延曰爾何敢後弘範徐進曰臨陣未  
嘗後受賞恥居先何為不可巴延  
為之俛首史傳不載謹附識之 十二年五月帝遣使

諭巴延駐兵弘範進曰聖恩待士卒誠厚然緩急之宜  
非可遠度今敵已奪氣正當乘破竹之勢取之豈宜迂  
緩使敵得計耶巴延然之馳詣闕面論形勢得旨進師  
十二年次瓜洲宋都統姜才勁兵二萬出揚子橋弘範

佐都元帥阿珠與戰敗之宋將張世傑孫虎臣等率水軍於焦山決戰弘範以一軍從旁橫擊至圖山東奪戰艦八十艘俘馘無數上其功改亳州萬戶左丞董文炳由海道會巴延次臨安近郊入城取宋主降表來上師還授江東道宣慰使十五年宋張世傑立廣王昺於海上閩廣響應帝命弘範往平之授蒙古漢軍都元帥陞辭賜錦衣玉帶不受以劍甲為請帝出武庫劍甲聽其自擇將行薦李恒為副至揚州選將校水陸二萬分道

南征以弟弘正為先鋒戒之曰選汝驍勇非私汝也軍法重我不敢以私撓公勉之弘正所向克捷進攻三江寨寨據險乘高兵皆持滿以待弘範令下馬治朝食若將持久之者持滿者疑不敢動而他寨不虞也忽麾軍連攻他寨迴擣三江盡拔之至漳州軍其東門命別將攻西南乃乘虛破其北門拔之又拔鮑浦寨瀕海郡邑皆望風降附獲宋丞相文天祥于五坡嶺使之拜不屈弘範義之待以賓禮送至京師獲宋禮部侍郎鄧光薦命子珪

師事焉十六年由潮陽港發舶入海至甲子門獲宋斥  
候將知廣王所在進次崖山宋軍千餘艘碇海中建樓  
櫓其上隱然堅壁也弘範引舟師赴之崖山東西對峙  
其北水淺舟膠非候潮不可進乃由山之東轉南入大  
洋始得逼宋舟按經世大典云宋人以烏蛋船千餘艘  
大舟之北弘範夜操小艇帶勁兵潛取  
之舟中皆海民不習戰殺虜靡遺即取烏蛋船載草乘  
風縱火宋預以泥塗艦懸水筒無數火船至鈎而沃之  
竟莫能燬乃與李恒畫圖定計本傳從畧附錄於此別出奇兵斷其汲路燒其宮  
室世傑有甥在弘範軍中三使招之不應李恒自廣州

至授以戰艦使守北面將戰或請先用砲弘範曰火起則舟散不如戰也四分其軍弘範自將一軍與宋軍相去里許下令曰宋舟潮至必遁急攻之勿令得去聞吾樂作乃戰先麾北軍乘潮而戰不克恒等順潮而退樂作宋將以為且宴少懈弘範舟師突犯其前衆繼之豫構戰樓於舟尾以布幙障之俾將自負盾而伏令之曰聞金聲則起飛矢集如蝟伏盾者不動舟將接鳴金撤幙弓弩火石交發頃刻并破七舟宋師大潰宋臣陸秀夫抱

其主曷赴水死世傑走交趾風壞舟死海陵港餘將吏  
皆降嶺海悉平是年卒贈平章政事諡武畧至大四年  
加贈齊國公改諡忠武延祐六年加封淮陽王諡獻武  
子珪自有傳兄弘畧

按弘畧舊附張柔傳今柔傳  
移入貳臣改附於弘範傳後

弘畧字仲傑嘗從父柔鎮杞徙亳權順天萬戶從征四川憲  
宗以其幼賜錦衣還鎮李壇反宋夏貴乘虛北奪亳滕  
徐宿邳滄濱七州新蔡符離蘄利津四縣弘畧率戰船  
遏之渦口貴退保蘄更發亳軍攻之宋兵焚城宵遁盡



復所陷州縣璵誅追問當時與璵通書者獨弘畧書皆  
勸以忠義事得釋俾解兵柄宿衛京師及城大都佐父  
柔為築城總管城成授淮東道宣慰使尋移江西饒州  
盜起犯都昌弘畧謂饒非吾屬然與南康止隔一湖此  
寇不滅則吾境必有相煽起者遣兵直搗其巢生縛賊  
首磔於市令曰不操兵者皆為平民一無所問頃之以  
疾歸毫有讒貴臣子在江南買田宅樂而忘歸者辭連  
弘畧或曰公未嘗在江南宜入見自辨弘畧曰辨之則

言者獲譴矣吾寧稱疾家居後見帝於龍虎臺命為河南參政卒封蔡國公諡忠毅

欽定續通志卷四百六十一

欽定四庫全書

欽定續通志卷四百六十二

列傳

元十六

劉秉忠

東恕

張文謙

郝經

劉秉忠字仲晦初名侃因從釋氏又名子聰其先瑞州人曾祖仕金為邢州節度副使因家焉庚辰歲穆呼哩

取邢州立都元帥府以其父潤為都統歷鉅鹿內丘兩  
縣提領東忠年十七補府令史嘗投筆嘆曰吾家累世  
衣冠乃汨沒為刀筆吏乎丈夫不遇於世當隱居以求  
志耳即棄去隱武安山中久之天寧禪師招致為僧使  
掌書記後遊雲中會海雲禪師被召邀與俱行入見應  
對稱旨屢承顧問東忠於書無所不讀尤邃於易及邵  
氏經世書至天文地理律歷三式

按三式雷公太乙  
六壬也見唐六典

壬遁甲之屬無不精通論天下事如指諸掌世祖大愛

之遂留藩邸父喪服除

按王磐神道碑云初丁母憂毀瘠骨立衣一敝裘三歲不易及

父卒雖身從天竺之教而服食貶損容貌哀戚與循典禮執通喪者無少異

奉旨還和林上

書數千言其畧曰天下之大非一人之可及萬事之細

非一心之可察當擇開國功臣子孫分為京府州郡監

守督責舊官以遵王法仍差按察官守治者升否者黜

天下不勞而定也天下戶過百萬自呼圖克諾延斡事

之後差徭甚大加以軍馬調發使臣煩擾官吏乞取民

不能當是以逃竄宜比舊減半或三分去一就見在之

民以定差稅招逃者復業再行定奪官無定次清潔者  
無以遷汙濫者無以降可比附古例定百官爵祿儀仗  
使家足身貴有犯於民設條定罪威福者君之權奉命  
者臣之職今百官自行威福進退生殺惟意之從宜加  
禁治天下之民未聞教化見在囚人宜從赦免明施教  
令使之知畏則犯者自少其教令既施罪不至死者皆  
提察然後決犯死刑者覆奏然後聽斷不致刑及無辜  
天子以天下為家兆民為子國不足取於民民不足取

於國相須如魚水有國家者置府庫設倉廩亦為助民  
民營產業闢田野亦為資國用也今宜核算官民欠負  
若實為應當差發所借宜依前旨一本一利官司歸還  
九賠償無名及虛契所負者並免追取納糧就遠倉有  
一廢十者宜從近倉以輸為便當驛路州城飲食祇待偏  
重宜計所費以準差發關市津梁正稅十五分取一宜  
從舊制禁橫征以利百姓倉庫加耗甚重宜令權量度  
均為一法使錙銖圭撮尺寸皆平以存信去詐珍貝金



銀之所出淘砂鍊石實不易為一旦以纏絲縷飾皮革塗木石粧器仗取一時之華麗廢為塵而無濟甚可惜也宜從禁治除帝胄功臣大官以下章服有制外無職之人不得僭越今地廣民微賦繁斂重民不聊生何力耕耨宜差勸農官二員率天下百姓務農桑營產業實國之大益古者庠序學校未嘗廢今郡縣雖有學並非官置宜修建三學設教授開選舉取士以經義為上詞賦策論次之更宜擇開國功臣子孫亦令入學選達才

任用之天下莫大於朝省親民莫近於縣宰雖朝省有  
法縣宰宜擇縣宰正民自安矣關西河南地廣土沃以  
兵馬之所出入治而未豐宜設官招撫不數年民歸土  
闢軍資攸濟實國之大事伊喇中丞拘權鹽鐵諸產商  
賈酒醋貨殖諸事以定宣課已不為輕鄂羅哈瑪爾奏  
請於舊額加倍權之科取民間民無所措手足宜從舊  
例辦權更或減輕毋從獻利之徒削民害國鰥寡孤獨  
廢疾者宜設孤老院給衣糧以為養使臣到州郡宜設

館不得於官衙民家安下孔子為百王師立萬世法今  
廟堂雖廢存者尚多宜令州郡祭祀釋奠如舊儀近代  
禮樂器具靡散宜令刷會徵太常舊人教引後學使器  
備人存漸以修之實太平之基王化之本今天下廣遠  
雖青吉斯皇帝威福之致亦天地神明所祐也宜訪名  
儒循舊禮尊祭上下神祇和天地之氣順時序之行使  
德極幽明天下賴一人之慶見行遼歷日月交食頗差  
聞司天臺改成新歷未見施行宜因新君即位頒歷改

元令京府州郡置吏漏使民知時國減史存古之常道  
宜撰修金史令一代君臣事迹不墜於後世國家廣大  
如天萬中取一以養天下名士宿儒之無營運產業者  
使不致困窮或有營運產業者止輸差稅其餘大小雜  
泛並行蠲免育才勵人之大也明君用人如大匠用材  
隨其巨細長短以施規矩繩墨小知大受各當盡其才  
而用之成功之道也私欲妄說常人有之蔽一心人君  
有之蔽天下宜選左右諫臣使諷諭於未形忖度於至

密也君子之心一於理義小人之心一於利欲今言利者衆非圖利國實欲自利也宜將國中人民必用場冶付各路課稅所以定權辦其餘言利者並行罷去古者治世均民產業今窮乏者益損富盛者增加宜量為節限筭篳之制宜會古酌今使無過越禁私置牢獄及鞭背之刑以彰愛生之德立朝省以統百官分有司以御衆事以至京府州縣親民之職無不備紀綱正於上法度行於下故天下不勞而治也今新君即位之初可立

朝省以為政本其餘百官不在員多惟在得人焉耳書  
上世祖嘉納焉又言邢州舊萬餘戶兵興以來不滿數  
百周壤日甚得良牧守如真定張耕洺水劉肅者治之  
猶可完復朝廷以耕為邢州安撫使肅為副使由是流  
民復業升邢為順德府征大理雲南及伐宋每贊以天  
地之好生王者之神武不殺故克城之日未嘗妄戮一  
人中統元年世祖即位問以治天下之大經養民之良  
法秉忠采祖宗舊典參以古制之宜於今者條列以聞

於是下詔建元紀歲立中書省宣撫司朝廷舊臣山林遺逸之士咸見錄用文物粲然一新秉忠雖居左右不改舊服時人稱為聰書記至元元年翰林學士承旨王鶚奏言秉忠侍藩邸積有歲年忠勤茂著宜被褒崇聖明御極萬物惟新而秉忠猶仍其野服散號深所未安帝覽奏即日拜光祿大夫位太保參預中書省事詔以學士竇默女妻之賜第奉先坊秉忠既受命以天下為已任事無巨細凡有關於國家大體者知無不言燕閑

顧問輒推薦人物凡所甄拔後悉為名臣初帝命秉忠  
相地於桓州東灤水北建城郭於龍岡三年而畢名曰  
開平繼升為上都而以燕為中都四年又命秉忠築中  
都城始建宗廟宮室八年奏建國號曰大元而以中都  
為大都他如頒章服舉朝儀給俸祿定官制皆自秉忠  
發之

按徐世隆祭文云扈從王師柔服哀牢公於是時  
蜀之韋皋堂上出奇鄂江飛渡公於是時晉之杜

預是秉忠尚有戰功也史氏  
特叙其創制之功故不載

為一代成憲十一年扈從

至上都無疾而卒帝驚悼謂羣臣曰秉忠事朕三十餘



年小心慎密不避艱險言無隱情其陰陽數術之精占  
事知來若合符契惟朕知之他人莫得聞也遣禮部侍  
郎趙秉溫護其喪追封趙國公諡文貞成宗時改諡文  
正仁宗時又進封常山王秉忠自幼好學至老不衰雖  
位極人臣而齋居蔬食澹然不異平昔每以吟咏自適  
其詩蕭散閑淡類其為人有文集十卷無子以弟秉恕  
子蘭璋後

秉恕字長卿好讀書年弱冠受易於劉肅遂明理學方

秉忠事世祖以薦士自任嫌於私親獨不及秉恕左右  
以聞召見遂同侍潛邸世祖嘗賜秉忠白金千兩辭曰  
臣山野鄙人僥倖遭際服器悉出尚方金無所用世祖  
曰卿獨無親故遺之邪乃受而散之以二百兩與秉恕  
秉恕曰兄勤勞有年宜蒙茲賞秉恕無功可冒恩乎終  
不受擢禮部侍郎歷彰德懷孟淄萊順天太原五路總  
管所至皆有惠政召除禮部尚書復出為湖州平陽兩  
路總管卒于官

張文謙字仲卿邢州沙河人幼聰敏善記誦與劉秉忠  
同學世祖居潛邸受邢州分地秉忠薦文謙可用召見  
命掌王府書記邢州當要衝初分為勲臣食邑歲遣人  
監領徵求百出民弗堪命文謙與秉忠言于世祖曰今  
民生困弊莫邢為甚盍擇人往治之責其成效使四方  
取法則天下均受賜矣乃選近侍托克托尚書劉肅侍  
郎李簡往三人至邢協心為治不期月流亡復歸戶增  
十倍由是世祖益重儒士任之以政皆自文謙發之世

祖征大理國相高泰祥

原誤作國主高祥  
今據大理傳改

拒命殺信使

遁去世祖怒將屠其城文謙與秉忠姚樞諫曰殺使拒  
命非民之罪請宥之乃止己未世祖帥師伐宋文謙與  
秉忠言王者之師有征無戰當一視同仁不可嗜殺世  
祖曰期與卿等守此言既入境分命諸將毋妄殺毋焚  
人室廬所獲生口悉縱之世祖即位立中書省首命王  
文統為平章政事文謙為左丞建立綱紀講明利病以  
安國便民為務詔令一出天下有太平之望而文統素

思克謨謀之際屢相可否積不能平文謙遂求出詔以本官行大名等路宣撫司事至官蠲常賦什之四商酒稅什之一二年來朝復留居政府會阿哈瑪特領左右部總司財用欲專奏請不關白中書詔廷臣議之文謙曰分制財用古有是理中書不預無是理也若中書弗問天子將親蒞之乎帝曰仲卿言是也至元元年復以中書左丞行省西夏中興等路羌俗素鄙野事無統紀文謙得蜀士之陷於俘掠者五六人理而出之使習吏事

旬月間簿書有品式子弟亦知讀書俗為一變浚唐來  
漢延二渠溉田十數萬頃人蒙其利三年還朝諸勢家  
言有戶數千當役屬為私奴者議久不決文謙謂以乙  
未歲戶帳為斷未占籍者歸之勢家其餘良民無為奴  
之理議遂定守以為法五年淄州妖人胡王惑眾事覺  
逮捕百餘人文謙曰愚民無知為所誑誘誅首惡足矣  
帝即命文謙往決其獄惟三人坐棄市餘皆釋之七年  
拜大司農卿奏立諸道勸農司巡行勸課請開籍田行

祭先農先蠶等禮復與竇默請立國子學選貴胄子弟  
教育之時阿哈瑪特議拘民間鐵官鑄農器高其價以  
配民創立行戶部於東平大名以造鈔及諸路轉運司  
干政害民文謙悉於帝前極論罷之十三年遷御史中  
丞阿哈瑪特慮憲臺發其姦乃奏罷諸道按察司以撼  
之文謙奏復其舊然自知為姦臣所忌力求去會世祖  
以大明厯歲久寢差命許衡等造新厯乃授文謙昭文  
館大學士領太史院事十九年拜樞密副使歲餘卒文

謙蚤從劉秉忠洞究術數晚交許衡无粹於理義之學  
為人剛明簡重數忤權倖是非得喪一不以經意家惟  
藏書數萬卷尤以引薦人材為已任封魏國公諡忠宣  
子晏按虞集張氏新瑩記云中統初政術與時高下獨  
成均之教彝倫大農之興稼穡厯象之授人時九  
出文謙所為皆隱  
然有不可變者仕至御史中丞

郝經字伯常澤州陵川人祖天挺元裕嘗從之學金末  
父思溫辟地河南魯山河南亂居民匿窖中亂兵以火  
熏灼之民多死經母許亦死經以密和寒蕝汁決母齒



飲之即蘇時經九歲人皆異之金亡徙順天家貧負薪  
為養暮則讀書為守帥張柔賈輔所知延為上客二家  
藏書皆萬卷經博覽無不通憲宗元年世祖開邸金蓮  
川召經諮以經國安民之道條上數十事大悅遂留王  
府是時連兵於宋世祖總統東師經從至濮會有得宋  
奏議以獻其言謹邊防守衝要凡七道下諸將議經曰  
古之一天下者以德不以力今宋未有敗亡之釁我乃  
空國而出諸侯窺伺於內小民凋弊於外經見其危未

見其利也王不如修德布惠結盟飭備以待西師上應  
天心下繫人望順時而動宋不足圖也世祖以經儒生  
愕然曰汝與張巴圖議邪經對曰經少館張柔家嘗聞  
其論議此則經臆說耳柔不知也復進七道議七千餘  
言乃以楊惟中為江淮荆湖南北等路宣撫使經副之  
將歸德軍先至江上宣布恩信招納降附聞憲宗在蜀  
師久無功進東師議其畧曰經聞圖天下之事於未然  
則易救天下之事於已然則難已然之中復有未然者

使往者不失而來者得遂是尤難也國家奮起朔漠滅金源并西夏蹂荊襄克成都平大理躡蹠諸夷奄征四海垂五十年今又闔國大舉以之伐宋而圖混一以志則銳以力則強而術則未盡也苟於諸國既平之後創立法制敷布條綱任將相選賢能平賦足用屯農足食內治既舉外禦亦備而後伺隙觀釁以正天伐自東海至襄鄧重兵數道聯幟接武以為正兵自漢中至大理輕兵捷出批吭抵脅以為奇兵帥臣得人師出以律高

拱九重之內而海外有截矣比者西師既構猝不可解  
兵連禍結底安於危王宜遣人稟命行在遣使喻宋令  
降名進幣割地納質姑與之和偃兵息民以全吾力而  
圖後舉稟命不從而後進師示以恩信曉以禍福使知  
王不得已而用兵之意一軍出襄鄧一軍出壽春一軍  
出維揚三道並進東西連衡王處一軍為之節制庶幾  
舉動出於萬全若直抵振迅銳而圖功一舉而下金陵  
舉臨安則可也如兵力耗弊後成遷延進退不可反為

敵人所乘悔可及乎臣愚所以諄諄於東師反覆致論  
謂不在於已然而在於未然者此也及渡江圍鄂州聞  
憲宗崩召諸將議經復進言曰國家自平金以來惟務  
取進不遵養時晦老師費財卒無成功三十年矣今國  
內空虛塔齊爾實喇諸王觀望所立莫不覬覦神器一  
有狡焉或啟戎心先人舉事腹背受敵大事去矣且額  
呼布格已行赦令令托里齊為斷事官行尚書省據燕  
都按圖籍號召諸道雖大王素有人望且握重兵獨不

見金世宗海陵之事乎宜亟定大計留勁兵把截江面  
與宋議和定疆界歲幣置輜重驛騎馳歸則彼之姦謀  
僭志冰釋瓦解遣一軍逆大行靈輿收皇帝璽召諸王  
駙馬會喪和林差官於諸路撫慰安輯命王子珍戢鎮  
燕都則大寶有歸而社稷安矣會宋守帥賈似道亦遣  
使乞和迺班師世祖即位以經為翰林侍讀學士充國  
信使使宋告即位且定和議經入辭帝曰朕初踐阼庶  
事草創卿當遠行凡可輔朕者亟以聞經奏便宜十六

事皆立政大要時經有重名平章王文統忌之陰屬李  
璫潛師侵宋欲假手害經經至濟南璫遺書止經經以  
璫書聞於朝行次宿州遣副使劉人傑參議高翹請入  
國日期不報時賈似道方以却敵為功恐經至謀泄遂  
以李璫為辭拘之真州經上表宋主曰願附魯連之義  
排難解紛豈知唐儉之徒款兵誤國又數上書宋主及  
宰執極陳戰和利害且請入見及歸國皆不報驛吏棘  
垣鑰戶晝夜守邏欲以動經經不屈諭從者曰死生進

退聽其在彼我終不能屈身辱命汝等不幸宜忍死待

之我觀宋祚殆不久矣尾七年從者死過半經獨與六

人處別館

按蘇天爵名臣事畧云宋人既留經詞氣不屈明年遣伴使朱寶臣偽報本朝兵亂經弗

聽復累言之經厲聲曰此事斷無有設有之當遣我輩還國元史本傳不載謹附識又九年丞相

巴延南伐帝遣尚書哈雅及經弟庸入宋問執行人之

罪宋懼遣總管段佑以禮送經歸賈似道之謀既泄尋

亦竄死明年至闕錫燕大庭咨以政事賞賚有差尋卒

諡文忠明年宋平經為人尚氣節為學務有用

按苟宗道行狀



云經嘗自誦曰不學無用學不讀非聖書世之為詞章者始則羣聚訕笑終亦拱視而服之

拘留十

六年思託言垂後撰續後漢書及易春秋外傳諸書凡

數百卷其文豐蔚豪宕善議論從者皆通於學書佐苟

宗道後官至國子祭酒經還之歲汴民射鴈金明池得

繫帛書詩云霜落風高恣所如歸朝回首是春初上林

天子援弓繳窮海疊臣有帛書後題曰至元五年

按陶宗儀

賴耕錄作中統十五年且云是時南北隔絕不知中統之改至元也考經還之歲實至元十一年本傳云至元

五年蓋史氏易

其文而誤耳 九月一日放鴈獲者勿殺國信大使郝

經書於真州忠勇軍營新館其忠誠如此二弟彛庸皆有  
名子采麟仕至肅政廉訪使

欽定續通志卷四百六十二